

## ❖ DYDD NADOLIG

Er gwaethaf sŵn y ffair a blys y dyrfa,  
Mae'r hen addewid yn parhau yn wir,  
A'r 'Mab a roddwyd inni' ar ei yrfa,  
A neges y Newyddion Da yn glir;  
Os bu Meseia Moses a'r proffwydi  
Yn wrthodedig pan yn Faban Mair,  
Gwawriodd y bore i weithwyr adael rhwydi  
A throi'n bysgotwyr dynion ar ei air:  
Mae'n dal i wneud pob diwrnod yn Nadolig,  
A throi y nos a'i niwl yn olau dydd,  
Gan ddryllio delwau ffôl ein byd canolig,  
A'i roddion Ef yw cariad, gobaith, ffydd.  
Mae gwefr yr ŵyl yn fyw i brofiad sant,  
A gŵyr nad coel flynyddol yw i blant.

**D. J. Thomas**